



**Ն.Ս.Օ.Տ.Տ. ԳԱՐԵԳԻՆ Բ. ԱՄԵՆԱՅՆ ՀԱՅՈՑ ԿԱԹՈՂԻԿՈՍԻ ԽՈՍՔԸ
ՅՈՒՐԻ ՎԱՐԴԱՆՅԱՆԻ ՀՈԳԵՂԱՆԳԱՏՅԱՆ ԱՐԱՐՈՂՈՒԹՅԱՆԸ**

(13 նոյեմբերի, 2018 թ.)

Սիրելի՛ սգակիր ժողովուրդ,

Այսօր աղոթքով և տխուր սրտով հրաժեշտ ենք տալիս Առաքելական մեր Սուրբ Եկեղեցու արժանավոր զավակ, աշխարհահռչակ ծանրորդ, ի Տեր հանգուցյալ Յուրի Վարդանյանին:

Լուսավոր ու ջերմ զգացումներով ենք անդրադառնում նրա երկրավոր կյանքի անցած ուղուն, ազգային մեր անդաստանում նրա գովարժան ավանդին, մարգաշխարհում ունեցած մեծ հռչակին ու բացառիկ ներդրումին և բազմաթիվ հայորդյաց ու տարբեր ազգերի մարգասերներին նրա փոխանցած ոգեշնչումին:

Բարեհիշատակ Յուրի Վարդանյանն իր մեջ կրում էր մեր ժողովրդի անկոտրում կամքի ու մաքառումների վկայությունը, հաղթանակներ կերտելու աննկուն ոգին: Ծանրամարտի մրցասպարեզում բացառիկ ելույթներով նա միշտ նոր նվաճումներ արձանագրեց՝ դառնալով Եւրոպայի և աշխարհի բազմակի շեմպիոն, օլիմպիական շեմպիոն: Աշխարհի առաջնություններում տասնյակ ռեկորդներ սահմանելով նա հավելեց փառքն ու հեղինակությունը մեր ժողովրդի: Մարզական իր փայլուն ուղիով, անձնական օրինակով, նաև մարզչական աշխատանքով մեծանուն հայորդին քաջալերել ու ոգեշնչել է նոր սերնդի մարզիկներին:

Լուսահոգի Յուրի Վարդանյանին ուժ էր տալիս և սնում նրա անպարտելի կամքն ու ոգին հայրենի երկիրը հզոր ու առաջընթացի մեջ տեսնելու երազանքը: Այդ ոգին դրսևորվում էր ոչ միայն ծանրամարտի հարթակում, այլև հայրենի մեր պետության նորոգ առաջընթացին ու մեր ժողովրդի բարօր գալիքի կերտմանը ծառայելու ձգտումի ու նվիրումի:

մեջ, որով նա ստանձնեց սպորտի և երիտասարդության հարցերի նախարարի և Վրաստանում ՀՀ դեսպանի պաշտոնները:

Հրաժեշտի այս պահին հոգելույս Յուրի Վարդանյանի պայծառ կերպարը՝ իր դյուցազնական ոգով, իր հայկյան ուժով, իր փառքի ու հռչակի մեջ, մեր առջև հառնում է նաև իր պարզահոգությամբ, բարի ու վեհանձն նկարագրով:

Ամենքիս համար ցավ է արժանավոր հայորդու անժամանակ մահը: Հանուն Գերագույն Հոգևոր Խորհրդի և Մայր Աթոռ Սուրբ Էջմիածնի միաբանության՝ բերում ենք Մեր վշտակցությունը ննջեցյալի ընտանիքին և բոլոր սգացյալներին:

«Եկե՛ք, Իմ Հոր օրհնյալներ, ժառանգեցե՛ք աշխարհի սկզբից ձեզ համար պատրաստված արքայությունը» (Մատթ. 25,34),- ասում է Քրիստոս աստվածահաճո և հավատավոր կյանքով ապրած Իր հետևորդներին: Տերունական այս կոչի համաձայն՝ հոգելույս Յուրի Վարդանյանը ժամանակավոր այս կյանքից անցնում է հանգրվանելու աստվածաշնորհ հավիտենական երանության, խաղաղության ու հանգստության մեջ:

Ի խորոց սրտի աղոթքով առ Բարեգութն Աստված հայցում ենք Սուրբ Հոգու մխիթարությունը բարեհիշատակ Յուրի Վարդանյանի ընտանիքին, հարազատներին, գործընկերներին և բոլոր վշտացյալներին: Թող նրա պանծալի անունը հավերժ ապրի հայորդյաց սրտերում:

Խունկ, աղոթք և օրհնություն մեծանուն հայորդու լույս հիշատակին:
Վշտակից սիրով և օրհնությամբ՝

ԳԱՐԵԳԻՆ Բ.

ԿԱԹՈՂԻԿՈՍ ԱՄԵՆԱՅՆ ՀԱՅՈՑ

